

Granična policija je bosanskohercegovačka priča o uspjehu



Godinu dana nakon početka pregovora s Evropskom unijom, bosanskohercegovačke vlasti moraju ispuniti preostale uvjete definirane planom aktivnosti za liberalizaciju viznog režima (*Mapa puta*), rekao je danas visoki predstavnik i specijalni predstavnik EU Valentin Inzko.

"To će omogućiti ukidanje viznih restrikcija, što će biti od ogromnog značaja za ljude koji putuju iz BiH", rekao je visoki predstavnik/specijalni predstavnik EU.

Povodom obilježavanja devete godišnjice osnivanja Granične policije BiH, Valentin Inzko je izjavio da je Granična policija BiH "osobito uspješna komponenta projekta evropske integracije Bosne i Hercegovine."

Visoki predstavnik/specijalni predstavnik EU je bio posebno obradovan činjenicom da se u posljednjih godinu dana poboljšala prekogranična saradnja sa Srbijom, Hrvatskom i Crnom Gorom, te je pohvalio direktora Dumančića zbog njegovog sposobnog rukovođenja Graničnom policijom.

"Ja stalno ističem da se regionalno okruženje u Jugoistočnoj Evropi poboljšava. Bosna i Hercegovina to mora iskoristiti", rekao je visoki predstavnik/specijalni predstavnik EU. "Granična policija je izvukla veliku korist iz pozitivnih odnosa sa drugim graničnim policijama u regionu i to je dovelo

do stvarnih koristi za građane, u smislu smanjenog prekograničnog kriminala i lakšeg putovanja.“

Međutim, istakao je da je još uvijek potrebno zaposliti više od 200 radnika u okviru ukupnog broja zaposlenih u Graničnoj policiji i pozvao je bosanskohercegovačke vlasti da odmah osiguraju zapošljavanje potrebnih kadrova.

“Granična policija BiH je uspješna priča, primjer kako država može pošteno i efikasno služiti svojih građanima. Ona mora nastaviti da prima finansijsku, logističku i institucionalnu podršku koja joj je potrebna“, rekao je visoki predstavnik/specijalni predstavnik EU. “U trenutku kada obilježavamo devetu godišnjicu Granične policije, ova agencija je multietničkog sastava, djeluje na prostoru cijele države i koristi savremenu opremu za profesionalno vršenje kompleksnog i zahtjevnog zadatka – to je model za druge agencije BiH“.